

BOSNA I HERCEGOVINA
Federacija Bosne i Hercegovine
TUZLANSKI KANTON
VLADA

-NACRT-

ZAKON
o izmjenama i dopunama Zakona o predškolskom odgoju i obrazovanju

Tuzla, decembar 2024. godine

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“ broj: 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ godine, d o n o s i

Z A K O N

O IZMJENAMA I DOPUNAMA ZAKONA O PREDŠKOLSKOM ODGOJU I OBRAZOVANJU

Član 1.

U Zakonu o predškolskom odgoju i obrazovanju – prečišćeni tekst („Službene novine Tuzlanskog kantona“, broj: 10/20 i 05/22) u članu 2. iza stava (2) dodaje se novi stav (3) koji glasi:

„(3) Svaki vid okupljanja grupe djece (više od dvoje djece) predškolske dobi, koji podrazumijeva obezbjeđen boravak, ishranu kao i organizovane aktivnost s djecom, izuzev okupljanja djece predškolske dobi pod nadzorom roditelja/staratelja u igraonicama u sklopu trgovačkih i ugostiteljskih objekata te okupljanja djece predškolske dobi u objektima vjerskih zajednica i crkava u svrhu vjerske pouke, smatra se predškolskim odgojem i obrazovanjem u smislu ovog zakona i realizuje se u predškolskim ustanovama.“

Dosadašnji stav (3) postaje stav (4).

U dosadašnjem stavu (3) koji postaje stav (4) iza riječi „posebnog“ dodaje se riječ „društvenog“.

Član 2.

U članu 16. u stavu (1) riječi „Predškolske ustanove obavljaju djelatnost odgoja i obrazovanja“ zamjenjuju se riječima „Djelatnost predškolskog odgoja i obrazovanja obavlja se“.

Član 3.

U članu 49. u stavu (4) riječ „osam“ zamjenjuje se brojem „12“.

Član 4.

U članu 66. iza stava (7) dodaju se novi stavovi (8), (9) i (10) koji glase:

„(8) Stupanjem na dužnost direktor predškolske ustanove sa predškolskom ustanovom zaključuje ugovor o obavljanju poslova direktora predškolske ustanove na puno radno vrijeme, koji u ime predškolske ustanove potpisuje predsjednik upravnog odbora ili drugo lice koje ovlasti upravni odbor.

(9) O pravima, obavezama, odgovornostima i drugim pravnim interesima direktora predškolske ustanove, ako ovim zakonom nije drugačije propisano, odlučuje upravni odbor.

(10) Protiv odluke iz stava (9) ovog člana direktor predškolske ustanove može upravnom odboru podnijeti zahtjev za njeno preispitivanje, kao i pokrenuti parnični postupak. Podneseni zahtjev za preispitivanje odluke ne odlaže njeno izvršenje.“

Član 5.

U članu 81. u stavu (1) u tački f) iza teksta „ustanove,“ dodaju se riječi „u skladu s mogućnostima“.

Član 6.

Iza člana 91. dodaje se novi član 91a. koji glasi:

„Član 91a.

(Kaznene odredbe)

(1) Pravno ili fizičko lice u svojstvu obrtnika koje bude zatečeno u realizovanju djelatnosti predškolskog odgoja iz člana 2. stav (3) ovog zakona, a pri tome nije registrovano kao predškolska ustanova, kaznit će se novčanom kaznom od 10.000,00 KM do 20.000,00 KM.

(2) Za prekršaj iz prethodnog stava kaznit će se i odgovorno lice u pravnom licu novčanom kaznom od 1.000,00 KM do 5.000,00 KM.

(3) Za prekršaj iz stava (1) pored novčane kazne može se izreći i zaštitna mjera zabrana obavljanja djelatnosti.“.

Član 7.

(Obaveza usklađivanja općih akata)

Predškolske ustanove dužne su uskladiti svoja opća akta sa odredbama ovog zakona u roku od šest mjeseci od dana stupanja na snagu ovog zakona.

Član 8.

(Završetak započeto pripravnčkog staža)

Lica koja su pripravnički staž započela prije stupanja na snagu ovog zakona isti će okončati u skladu sa odredbama koje su važile u momentu započinjanja pripravničkog staža.

Član 9.

(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Skupština
Broj:
Tuzla,

Predsjednik
Skupštine Tuzlanskog kantona

Žarko Vujović

O B R A Z L O Ž E N J E

Nacrta Zakona o izmjenama i dopunama Zakona o predškolskom odgoju i obrazovanju

I – PRAVNI OSNOV ZA DONOŠENJE ZAKONA

Pravni osnov za donošenje ovog Zakona sadržan je u poglavlju IV 2. član 24. c) Ustava Tuzlanskog kantona („Službene novine TPK“, broj: 7/97 i 3/99 i „Službene novine TK“, broj: 13/99, 10/00, 14/02, 6/04 i 10/04), kojim je utvrđeno da Skupština Tuzlanskog kantona donosi zakone i ostale propise neophodne za izvršavanje nadležnosti Kantona.

II – RAZLOZI ZA DONOŠENJE ZAKONA

Programom rada Skupštine Tuzlanskog kantona za 2024. godinu („Službene novine Tuzlanskog kantona“, broj: 5/24) predviđeno je donošenje predmetnog zakona a sem toga razlozi za donošenje Zakona o izmjenama i dopunama Zakona o predškolskom odgoju i obrazovanju su popunjavanje pravnih praznina uočenih tokom primjene zakona na koje je također ukazano i u presudi Kantonalnog suda u Tuzli, kao i usklađivanje pojedinih odredbi sa odredbama propisa koje tretiraju druge djelatnosti obrazovanja.

III – OBRAZLOŽENJE POJEDINIH RJEŠENJA

Član 1. vrše se dopuna postojećeg člana 2. kako bi se jasnije definisalo šta se smatra djelatnošću predškolskog odgoja i obrazovanja koja se može realizovati isključivo u predškolskim ustanovama, obzirom da je primjećen rastući trend otvaranja privatnih ustanova koje se bave čuvanjem djece i brigom o djeci a nadležni inspektori nemaju mogućnost nadzora takvih ustanova.

Član 2. vrši se izmjena u članu 16. u stavu (1) radi preciziranja odredbe, kako bi se učinila jasnijom obzirom na poredloženu dopunu člana 2.

Član 3. vrši se izmjena u članu 49. stav (4) kako bi se trajanje pripravničkog staža ujednačilo u svim djelatnostima obrazovanja a i obzirom na činjenicu da i inače u drugim djelatnostima pripravnički staž zaposlenika sa VSS traje dvanaest mjeseci.

Član 4. u članu 66. predloženo je dodavanje novih stavova kojim se reguliše pitanje radnog odnosa direktora predškolske ustanove. Naime, kako do sada nije bilo definisano da direktor sa predškolskom ustanovom mora zaključiti ugovor kojim se obavezuje na puno radno vrijeme u ustanovi, to smo imali situacije da su direktori bili angažovani kao menadžeri, a presudom Kantonalnog suda u Tuzli nam je ukazano na to da je, obzirom na društveni značaj i ulogu predškolskih ustanova, neophodno regulisati na način da se poslovi direktora u takvim ustanovama ne mogu obavljati bez zasnivanja radnog odnosa.

Član 5. vrši se dopuna u članu 81. stavu (1) tački f) kako bi se odredba učinila jasnijom po uzoru na ostale odredbe iz istog stava.

Član 6. dodaje se nova kaznena odredba koja će omogućiti nadležnim inspektorima da u slučaju da zateknu pravno ili fizičko lice u svojstvu obrtnika u obavljanju djelatnosti predškolskog odgoja kako je ona definisana u predloženom članu 2. stav (3) isto mogu sankcionisati.

Član 7. prelazna odredba kojom se definiše rok za usklađivanje općih akata predškolskih ustanova sa ovim zakonom.

Član 8. prelazna odredba kojom se definiše završetak započetog pripravničkog staža obzirom da je predložena izmjena dužine istog.

Član 9. definiše se momenat stupanja na snagu ovog zakona.

IV – FINANSIJSKA SREDSTVA

Ni jedna od predloženih odredbi Zakona o izmjenama i dopunama Zakona o predškolskom odgoju i obrazovanju, ne iziskuje dodatna finansijska sredstva u Budžetu Tuzlanskog kantona za 2024. godinu kao ni naredne budžetske godine što je definisano i obrascu IFP - NE.

V – PRIJEDLOG

Na osnovu izloženog predlažemo Skupštini Tuzlanskog kantona da po redovnom postuku shodno odredbama člana 124. Poslovnika Skupštine Tuzlanskog kantona uvrsti utvrđeni nacrt Zakona o izmjenama i dopunama Zakona o predškolskom odgoju i obrazovanju, na prvu narednu sjednicu Skupštine Tuzlanskog kantona.

OBRADIVAČ
MINISTARSTVO OBRAZOVANJA I NAUKE